

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN
DARIPADA : TUAN CHUA TIAN CHANG @ TIAN CHUA [BATU]
TARIKH : 25.11.2014 (SELASA)

TUAN CHUA TIAN CHANG @ TIAN CHUA [BATU] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah langkah-langkah yang diambil Kementerian untuk meninjau harga makanan di sekitar Kuala Lumpur. Berapa kerap pemeriksaan dijalankan dalam satu tahun. Berapa ramai kedai ditangkap atas kesalahan sengaja meninggikan harga dan adakah tindakan undang-undang telah diambil.

JAWAPAN:

Tuan Yang Dipertua,

Kementerian Perdagangan Dalam Negeri, Koperasi dan Kepenggunaan mempunyai seramai 1,800 Pegawai Penguatkuasa di seluruh negara bagi menjalankan tugas-tugas penguatkuasaan. Selain itu, Kementerian turut melantik Pegawai Pemantau Harga untuk membuat pemantauan ke atas pasaraya besar, pasaraya, pasar basah, pasar mini, kedai serbaneka 24 jam, kedai runcit dan premis makanan siap masak di seluruh negara.

Di Kuala Lumpur, terdapat seramai 108 Pegawai Pemantau Harga yang menjalankan tugas memantau dan membuat tinjauan ke atas premis-premis agar para peniaga tidak mengambil kesempatan menaikkan harga barangan dengan sewenang-wenangnya. Pemantauan harga di premis-premis perniagaan di seluruh negara ini dijalankan setiap hari di pasaraya, *hypermarket*, pasar basah, pasar mini, kedai serbaneka 24 jam dan kedai runcit. Manakala pemantauan ke atas premis makanan siap masak dijalankan setiap bulan yang merangkumi premis-premis seperti Restoran Melayu, Restoran Cina, Restoran India Muslim, dan Medan Selera bagi memastikan peniaga tidak mengambil untung yang berlebihan.

Kementerian turut melaksanakan **pemeriksaan dan pemantauan yang rapi dan menyeluruh** ke atas semua barangan melalui **OPS HARGA 2014**. Sehingga **23 September 2014**, sebanyak **1,157,637 pemeriksaan** telah dilakukan dan **4,731 tindakan undang-undang** telah diambil ke atas peniaga yang melibatkan **rampasan bernilai RM919,693.55** dan **kompaun sebanyak RM234,400** bagi seluruh negara.

Melalui tindakan operasi ini juga, sebanyak **126,426 pemeriksaan** premis telah dilaksanakan di sekitar Kuala Lumpur ke atas semua peringkat perniagaan dan **236 tindakan undang-undang** telah diambil ke atas peniaga yang melibatkan **rampasan bernilai RM147,515.00** dan **kompauun sebanyak RM39,500.00**.

Tindakan undang-undang yang dimaksudkan itu adalah sebanyak **175 tindakan** di bawah kesalahan **tidak mempamerkan tanda harga atau senarai harga bagi barangan yang dijual**, **55 tindakan** di bawah kesalahan **gagal menentusah alat timbang dan sukat yang digunakan untuk perniagaan** serta **6 tindakan** di bawah kesalahan **petunjuk atau gambaran yang mengelirukan mengenai harga**.

Bagi membendung kenaikan harga yang tidak munasabah oleh peniaga yang tidak bertanggungjawab, **tindakan pengeluaran notis di bawah Sekyen 21 Akta Kawalan Harga dan Antipencatutan 2011 dilaksanakan** ke atas mana-mana pihak yang didapati menaikkan harga secara mendadak dan ketara. Peniaga yang gagal atau enggan memberi penjelasan terhadap kenaikan tersebut boleh dikenakan tindakan undang-undang. Sehingga **23 September 2014**, sebanyak **89 notis** telah dikeluarkan di seluruh negara.

Oleh yang demikian, melalui tindakan-tindakan ini, hasrat Kerajaan untuk menangani masalah kenaikan harga barangan oleh peniaga secara sewenang-wenangnya dapat dicapai dan pihak Kementerian akan terus mempertingkatkan penguatkuasaan ke atasnya.